

集古官印考證

集古官印攷卷五

嘉定瞿中溶編輯

男樹鎬校刊

貳師將軍印

桂氏

右印文曰貳師將軍印攷漢書武帝紀太初元年八月遣貳師將軍李廣利發天下謫民西征大宛注張晏曰貳師大宛地名又見本傳及匈奴傳

伏波將軍章

吳氏

右印文曰伏波將軍章攷史記漢興以來將相名臣年表元鼎五年衛尉路博德爲伏波將軍在桂陽破南越集古印譜曰案伏波將軍前漢路博德後漢馬援陳登夏侯惇魏滿寵甄像孫禮盧欽晉孫秀葛洪陶延皆爲此官魏晉宋五品後魏北齊從五品梁四班後周五命其名其人不一而邵公濟

記此印據犬文內嚮直以爲馬新息所假印恐未必然使犬文外嚮尙可立說爲路或爲馬侯先所假者內向者乃其常援旣正之後自不應復誤據內向便爲馬侯未爲至論又謂伏波云者止博德與援攷之不審矣印文大而巧鈕不合制疑六朝後物也河南邵博論曰客有行雲陽嵯峨山中得古印寸餘塗金駝鈕其文曰伏波將軍章蓋漢印字用五土數也然漢有兩伏波前將軍邳離路博德也後將軍新息馬援也予攷其篆畫知其爲馬援印焉案世祖建武十七年交趾女子徵側反攻沒其郡九真日南合浦蠻夷皆應之寇略領外六十餘城側自立爲王詔拜馬援伏波將軍印書伏字犬文向外恐天下不正者多符印所以爲信也所宜齊同薦曉古文字者事下大司空正郡國印章奏可以路博德在援之

前未經是正其印犬文外向無疑此印犬文內向是後改定者爲援印也明矣以漢百官志攷之將軍不常置皆主征伐事訖則已曰大將軍驃騎前後左右將軍其名其人不一而以伏波上博德與援也蓋皆水戰援旣南征將樓船二千艘戰士二萬餘斬五千級降以萬計斬其魁傳首京師方其馘牛醢酒勞饗軍士官屬慷慨相語其意氣盛矣當時萬里之外一軍之中視此方寸印爲何如哉豈亦自料後此千餘載委於荆菅瓦礫之地爲牛童馬卒之所得也好事者百金可贖也又況不以功業取富貴欲其區區傲天下而垂後世斯惑矣此印亦見范氏印譜文略同云鍍金龜鈕蓋先爲范所藏也

輕車將軍章

右輕車將軍章案宋書百官志輕車將軍漢武帝以公孫賀爲之

奮武將軍章

顧譜龜鈕

右奮武將軍章攷史記年表永元二年七月太常任千秋爲奮武將軍擊西羌又見馮奉世傳元帝紀及沈約宋書皆作奮威又漢書王莽傳遣奮武將軍王駿出張掖集古印譜曰奮武將軍後漢末呂布爲之中潞攷三國魏志王允以呂布爲奮威大將軍亦作威且有太字自此以後皆志所謂雜號將軍也

奮威將軍章

印存

右奮威將軍章詳前

振武將軍章

顧譜龜鈕

右振武將軍章案宋書百官志云振武將軍前漢末王況爲之中洛攷漢書王莽傳始建國元年十二月遣振武將軍王嘉出代郡

虎牙將軍章

印統龜鈕

右虎牙將軍章案宋志以虎牙將軍列於四十號將軍內云或是後漢及魏所置中洛攷漢書王莽傳詔云大司空隆新公宗室戚屬前以虎牙將軍東指則反虜破壞又拜藺苞爲虎牙將軍又匈奴傳以雲中太守田順爲虎牙將軍又王莽拜藺苞爲虎牙將軍則非始於後漢明矣沈休文之言多未可信此印亦見范譜其文略同云鍍金龜鈕

征虜將軍章

顧譜塗金龜鈕

右征虜將軍章攷東觀漢記祭遵爲征虜將軍廉潔奉公光

武歎曰安得憂國奉公如祭征虜者乎宋書百官志征虜將軍漢光武建武中始以祭遵居之

建威將軍章

范氏龜鈕印存

右建威將軍章攷史記年表永光二年七月雲中太守韓次君爲建威將軍擊羌後不行宋志建威將軍漢光武建武中以耿弇爲建威大將軍乃在其後且有大字非也東觀漢記亦有大字

建威偏將軍

印叢

右印文曰建威偏將軍當是耿弇所爲大將軍之副然印文五字而無章字似王莽時物

建義將軍章

吳氏孔氏龜鈕范氏

右建義將軍章攷東觀漢記曰光武以朱祐爲建義將軍攻

朱鮪而後漢書朱祐傳作建義大將軍有大字似誤衍

揚武將軍章

查氏

右揚武將軍章攷宋志揚武將軍光武建武中以馬成爲之此印四圍有界線與前龍頡侯及廣阿侯夫人二印同此印亦見范譜其文不異云鍍金龜鈕蓋先藏范氏也

振威將軍章

印統查氏

右振威將軍章攷宋志振威將軍後漢初宋登爲之

材官將軍章

范氏龜鈕

右材官將軍章四圍有界類前一印攷宋書百官志云材官將軍漢武帝以李息爲之此印形制大字不整齊當非漢印

鎮北將軍章

印統桂氏

右鎮北將軍章攷宋志有鎮北將軍言鎮東鎮西鎮北三將

軍皆後漢置

揚烈將軍章

顧譜

右揚烈將軍章攷宋志揚烈將軍漢建安中以假公孫淵翁
閣學方綱兩漢金石記云獻帝初平三年六月以郭汜爲揚烈
將軍胡三省通鑑注揚烈將軍蓋始於是

虎威將軍章

右虎威將軍章案虎威將軍見宋志四十號將軍內云漢建
安中于禁居之

輔國將軍章

金氏龜鈕塗金

右輔國將軍章攷宋志輔國將軍漢獻帝以伏完居之

折衝將軍章

龜鈕

右折衝將軍章攷宋志折衝將軍漢建安中魏武以樂進居

之

鷹揚將軍章

范氏鍍金龜鈕印叢龜鈕顧譜

右鷹揚將軍章攷宋志鷹揚將軍漢建安中魏武以曹洪居之

建武將軍章

印存龜鈕顧譜

右建武將軍章集古印譜曰建武將軍漢韓安國王晏並爲之則宋志謂建武將軍魏置非也

掃寇將軍章

查氏

右掃寇將軍章案掃寇將軍見宋志四十號內以下皆同

宣威將軍章

印叢龜鈕

右宣威將軍章

凌江將軍章

顧譜金氏龜鈕

右凌江將軍章

綏邊將軍章

顧譜龜鈕

右綏邊將軍章

掃虜將軍章

金氏龜鈕

右掃虜將軍章

綏戎將軍章

桂氏

右綏戎將軍章

威武將軍章

桂氏

右威武將軍章

強弩將軍之章

桂氏

右強弩將軍之章詳前強弩都尉印下此印多之字與前諸印不類恐非同時物

平難將軍章

右平難將軍章攷平難將軍不見於宋書隋書諸志而形制字文不似漢以後物故附漢將軍各印之末

討葳辦軍印

顧譜龜鈕

右討葳辦軍印案辦軍之名不見於官志討葳辦軍當卽討葳將軍之副貳攷漢書王莽傳始建國四年嚴尤奏言匈奴未克夫餘穢貉復起此大憂也莽不尉安穢貉遂反以尤爲討穢將軍此印五字正與王莽時印制合當爲莽時物辦軍之名蓋亦莽所創也穢乃葳之俗字匈奴傳直上谷以東接穢貉朝鮮亦作穢而莽傳滅貉又从水作滅又武帝紀元朔元年東夷葳君南閭等二十八萬人降爲蒼海郡晉灼曰葳古穢字又嚴安上書云略葳州師古曰葳州是地名葳與穢

通音穢卽古濊貉國本朝鮮地漢武置滄海郡又地理志元菟樂浪武帝時置皆朝鮮濊貉勾驪蠻夷師古曰濊音穢字或作葳其音同而鄭康成注周禮秋官蜡氏葳惡反考工記草葳敗葳皆作葳字又攷後漢書明帝紀永平元年烏桓濊貉咸來助祭安帝紀元初五年六月高勾驪與穢貉寇元菟後又屢見又東夷傳自單單大山領以東沃沮濊貉悉屬樂浪又三國魏志云自單單大山領以西屬樂浪自領以東七縣都尉主之皆以穢爲民又晉書東夷傳夫餘國在元菟北千餘里南接鮮卑北有弱水地方二千里其國殷富自先世以來未嘗被破其印文稱穢王之印國中有古穢城本穢貉之城也又太平寰宇記云穢亦朝鮮之地後漢光武帝封其渠帥爲縣侯皆歲時朝賀無大君長自漢以來其官有侯邑君

三老統主下戶其耆舊自謂與高勾麗同種言語法俗大抵相類魏齊王正始六年滅侯等舉邑降四時詣樂浪帶方二郡朝謁並今東夷之地有軍政賦調如華人焉又云東沃沮國後漢通焉初衛滿王朝鮮時沃沮屬焉至漢武帝平朝鮮分其地爲四郡以沃沮城爲元菟郡後爲夷貊所侵徙郡於高勾麗西北至光武以其渠帥爲縣侯不耐華麗沃沮諸縣皆爲侯國後漢末猶置功曹主簿諸曹皆穢人作之其諸邑落渠帥皆自稱三老則故縣國之制也後以國小迫於大國之間遂臣屬勾麗

輔國將軍長史

范氏鼻鉏

右印文曰輔國將軍長史輔國將軍見前長史乃其屬官也
鎮南軍假司馬

右印文曰鎮南軍假司馬案宋志有四鎮將軍云鎮南將軍一人後漢末劉表居之此假司馬或是其屬官

強弩司馬

印叢龜鈕願譜鼻鈕

右印文曰強弩司馬案強弩司馬當卽強弩將軍之司馬據此知雜號將軍亦置司馬攷史記年表元朔五年李沮爲強弩將軍屬大將軍衛青擊匈奴又神爵元年四月樂成侯許延壽爲強弩將軍

輔國司馬

印存

右印文曰輔國司馬案當卽輔國將軍之司馬與強弩司馬同輔國將軍見前

強弩假候

願譜

右印文曰強弩假候案與強弩司馬同意據此知雜號將軍

亦有假候也不云軍假候者蓋印以四字爲文故省去也

橫海候丞

顧譜鼻鈕

右印文曰橫海候丞攷史記衛將軍傳將軍韓說以待詔爲橫海將軍擊東越有功爲按道侯則此當是橫海將軍之候丞也史言諸校尉有丞而將軍部下亦有校尉前有軍曲候丞印當是大將軍之候丞據此知雜號將軍亦有候丞矣皆可補史之闕略

立義丞印

顧譜瓦鈕

右立義丞印集古印譜曰前漢表凡校尉都尉皆有丞漢建安中龐德爲立義將軍吳孫和以屈幹爲立義都尉

立義從事

顧譜

右印文曰立義從事案立義從事當亦立義將軍之屬官百

官志言將軍有從事中郎二人蓋從事一人中郎一人此卽其從事也漢末以後往往以從事中郎爲一人并據此知雜號將軍亦有從事矣

立義行事

范氏鼻鈕顧譜同

右印文曰立義行事案集古印譜引吳孟思西域傳車師後王穀燉煌行事注行事謂行長史事漢桂陽太守周憬碑陰有故行事耒陽華夏蜀志馬騰爲軍行事領部衆中涓案後漢書西域傳永甯元年後王軍就及母沙麻反畔殺部司馬及燉煌行事注云和帝時置戊巳校尉鎮車師後部行事謂前行長史索班攷隸釋孔廟置百石孔龢碑有行長史事司隸校尉楊孟文石門頌及巴郡太守張納碑陰俱有行丞事此印文云立義行事立義乃雜號將軍將軍下有長史又校